

官常典

官常典第一百七十八卷

公輔部彙考二

宋

宋承魏晉太宰太傅太保相國丞相太尉司徒司空大司馬大將軍皆爲公曹屬增省不一以重臣錄尙書事其尙書令左右僕射總機衡而詔命又置中書監令以主之按宋書百官志太宰一人周武王時周公旦始居之掌邦治爲六卿之首秦漢魏不常置晉初依周禮備置三公三公之職太師居首景帝名師故置太宰以代之太宰蓋古之太師也殷紂之時箕子爲太師周武王時太公爲太師周成王時周公爲太師周公薨畢公代之漢西京初不置平帝始復置太師官而孔光居焉漢東京又廢獻帝初董卓爲太師卓誅又廢魏世不置晉旣因太師而置太宰以安平王孚居焉太傅一人周成王時畢公爲太傅漢高后元年初用王陵

太保一人殷太甲時伊尹爲太保周武王時召公爲太保漢平帝元始元年始用王舜後漢至魏不置晉初復置焉自太師至太保是爲三公論道經邦燮理陰陽無其人則闕所以訓護人主導以德

義者

相國一人漢高帝十一年始置以蕭何居之罷丞相何薨曹參代之參薨罷魏齊王以晉景帝爲相國晉惠帝時趙王倫愍帝時南陽王保安帝時宋高祖順帝時齊王並爲相國自魏晉以來非復人臣之位矣

丞相一人殷湯以伊尹爲右相仲虺爲左相秦悼武王二年始置丞相官丞奉相助也悼武王子昭襄王始以樗里疾爲丞相後又置左右丞相漢高帝初置一丞相十一年更名相國孝惠高后置左右丞相文帝二年復置一丞相哀帝元壽二年更名大司徒漢東京不復置至獻帝建安十三年復置丞相魏世及晉初又廢惠帝世趙王倫篡位以梁王彤爲丞相永興元年以成都王穎爲丞相愍帝建興元年以琅邪王睿爲左丞相南陽王保爲右丞相三年以保爲相國睿爲丞相元帝永昌元年以王敦爲丞相轉司徒荀組爲太尉以司徒官屬并丞相爲留府敦不受成帝世以王導爲丞相罷司徒府以爲丞相府導薨罷丞相復爲司徒府

太尉一人自上安下曰尉掌兵事郊祀掌亞獻大喪則告謚南郊堯時舜爲太尉官漢因之武帝建

元二年省光武建武二十七年罷大司馬置太尉以代之靈帝末以劉虞爲大司馬而太尉如故司徒一人掌民事郊祀掌省牲視濯大喪安梓宮少昊氏以鳥名官而祝鳩氏爲司徒堯時舜爲司徒舜攝帝位命契爲司徒契元孫之孫曰微亦爲夏司徒周時司徒爲地官掌邦教漢西京初不置哀帝元壽二年罷丞相置大司徒光武建武二十七年去大

司空一人掌水土事郊祀掌掃除陳樂器大喪掌將校復土舜攝帝位以禹爲司空契之子曰冥亦爲夏司空殷湯以咎單爲司空周時司空爲冬官掌邦事漢西京初不置成帝綏和元年更名御史大夫爲大司空哀帝建平二年復爲御史大夫元壽二年復爲大司空光武建武二十七年去大字獻帝建安十三年又罷司空置御史大夫御史大夫郗慮免不復補魏初又置司空

大司馬一人掌武事司主也馬武曰堯時棄爲后稷兼掌司馬周時司馬爲夏官掌邦政項籍以曹咎周殷並爲大司馬漢初不置武帝元狩四年初置大司馬始直云司馬議者以漢有軍候千人司馬官故加大及置司空又以縣道官有獄司空又加大王莽居攝以漢無小司徒而定司馬司徒司空之號並加大光武建武二十七年省大司馬以太尉代之魏文帝黃初二年復置大司馬以曹仁

居之而太尉如故

大將軍一人凡將軍皆掌征伐周制王立六軍晉獻公作二軍公將上軍將軍之名起於此也楚懷王遣三將入關宋義爲上將漢高帝以韓信爲大將軍漢西京以大司馬冠之漢東京大將軍自爲官位在三司上魏明帝青龍三年晉宣帝自大將軍爲太尉然則大將軍在三司下矣其後又在三司上晉景帝爲大將軍而景帝叔父孚爲太尉奏改大將軍在太尉下後還復舊晉武帝踐阼安平王孚爲太宰鄭冲爲太傅王祥爲太保義陽王望爲太尉何曾爲司徒荀顗爲司空石苞爲司馬陳騫爲大將軍凡八公同時並置唯無丞相焉有蒼頭字宜祿至漢丞相府每有所關白到閣輒傳呼宜祿以此爲常丞相置三長史丞相有疾御史大夫率百僚三旦問起居及謬詔遣尙書令若光祿大夫賜養牛上尊酒漢景帝三公病遣中黃門問病魏晉則黃門郎尤重者或侍中也魏武爲丞相以來置左右二長史而已漢東京太傅府置掾屬十人御屬一人令史十二人不知皆何曹也自太尉至大將軍車騎驃騎衛將軍皆有長史一人將軍又各置司馬一人太傅不置長史也太尉府置掾屬二十四人西曹主府吏署用事東曹主二千石長吏遷除事戶曹主民戶祠祀農桑事奏曹主

奏議事辭曹主辭訟事法曹主郵驛科程事尉曹主卒徒轉運事賊曹主盜賊事決曹主罪法事兵曹主兵事金曹主貨幣鹽鐵事倉曹主倉穀事黃閣主簿省錄衆事御屬一人令史二十二人御屬主爲公御令史則有閣下記室門下令史其餘史闕案掾屬二十四人自東西曹凡十二曹然則曹各置掾屬一人合二十四人也司徒置掾屬三十一人御屬一人令史三十五人司空置掾二十九人御屬一人令史三十一人司空別有道橋掾其餘張減史闕不可得知也漢東京大將軍驃騎將軍從事中郎二人掾屬二十九人御屬一人令史三十人騎衛將軍從事中郎二人掾屬二十人御屬一人令史二十四人兵曹掾史主兵事稟假掾史主稟假又置外刺姦主罪法其領兵外討則營有五部部有校尉一人軍司馬一人部下有曲曲有軍候一人曲下有屯屯有屯長一人若不置校尉則部但有軍司馬一人又有軍假司馬軍假候其別營者則爲別部司馬其餘將軍置以征伐者府無員職亦有部曲司馬軍候以領兵焉案大將軍以下置令史御屬者則是同三府也其云掾史者則是有掾無屬又無令史御屬不同三府也魏初公府職寮史不備書及晉景帝爲大將軍置掾十人西曹東曹戶曹倉曹賊曹金曹水曹兵曹騎兵各一人則無屬矣魏咸熙中晉文帝爲相國相

國府置中衛將軍驍騎將軍左右長史司馬從事中郎四人主簿四人舍人十九人參軍二十二
人參戰十一人掾屬三十三人東曹掾屬各一人西曹屬一人戶曹掾一人屬二人賊曹掾一人屬二
人金曹掾屬各一人兵曹掾屬各一人騎兵掾二人屬一人車曹掾屬各一人鎧曹掾屬各一人水
曹掾屬各一人集曹掾屬各一人法曹掾屬各一人奏曹掾屬各一人倉曹屬二人戎曹屬一人馬
曹屬一人媒曹屬一人合爲三十三人散屬九人凡四十二人晉初凡位從公以上置長史西閣東
閣祭酒西曹掾曹掾戶曹倉曹賊曹屬各一人加兵者又置司馬從事中郎主簿記室督各一人舍
人四人爲持節都督者置參軍六人安平獻王孚爲太宰增掾屬爲十人兵凱士營軍刺姦五曹皆
置屬并前爲十人也楊駿爲太傅增祭酒爲四人掾屬爲二十人兵曹分爲左右法金田集水戎車
馬十曹皆置屬則爲二十人趙王倫爲相國置左右長史司馬從事中郎四人參軍二十人主簿記
室督祭酒各四人掾屬四十人東西曹屬其餘十八曹皆置掾則四十人矣凡諸曹皆置御屬令史
學幹御屬職錄事也江左以來諸公置長史倉曹掾戶曹屬東西閣祭酒各一人主簿舍人二人御
屬二人令史無定員領兵者置司馬一人從事中郎二人參軍無定員加崇者置左右長史司馬從

事中郎四人掾屬四人則倉曹增置屬戶曹置掾江左加崇極於此也長史司馬舍人秦官從事中郎掾屬主簿令史前漢官陳湯爲大將軍王鳳從事中郎是也御屬參軍後漢官孫堅爲車騎參軍事是也本于府主無敬晉世太原孫楚爲大司馬石苞參軍輕慢苞始制施敬祭酒晉官也漢吳王濞爲劉氏祭酒夫祭祀以酒爲本長者主之故以祭酒爲稱漢之侍中魏之散騎常侍高功者並爲祭酒焉公府祭酒蓋因其名也長史從事中郎主吏司馬主將主簿祭酒舍人主閤內事參軍掾屬令史主諸曹事司徒若無公唯省舍人其府常置其職寮異于餘府有左右長史左西曹掾屬各一人餘則同矣餘府有公則置無則省晉元帝爲鎮東大將軍及丞相置從事中郎無定員分掌諸曹有錄事中郎度支中郎三兵中郎其參軍則有諮議參軍二人主諷議事晉江左初置因軍諮祭酒也宋高祖爲諮議參軍無定員今諸曹則有錄事記室戶曹倉曹中直兵外兵騎兵長流賊曹刑獄賊曹城局賊曹法曹田曹水曹鎧曹車曹士曹集右戶墨曹凡十八曹參軍參軍不署曹者無定員江左初晉元帝鎮東丞相府有錄事記室東曹西曹度支戶曹法曹金曹倉曹理曹中兵外兵騎兵典兵兵曹賊曹運曹禁防典賓鎧曹田曹士曹騎士車曹參軍其東曹西曹度支金曹理典兵兵曹

賊曹運曹禁防典賓騎士軍曹凡十三曹金闕所餘十二曹也其後又有直兵長流刑獄城局水曹右戶墨曹七曹高祖爲相合中兵直兵置一參軍曹則猶二也今小府不置長流參軍者置禁防參軍蜀丞相諸葛亮府有行參軍晉太傅司馬越府又有行參軍兼行參軍後漸加長兼字除拜則爲參軍事府板則爲行參軍晉末以來參軍事行參軍又各有除板板行參軍不則長兼行參軍參軍督護江左置本皆領營有部曲今則無矣公府長史司馬秩千石從事中郎六百石東西曹掾四百石他掾三百石屬二百石

尙書古官也舜攝帝位命龍作納言卽其任也周官司會鄭元云若今尙書矣秦世少府遣吏四人在殿中主發書故謂之尙書尙猶主也漢初有尙冠尙衣尙食尙浴尙席尙書謂之六尙戰國時已有尙冠尙衣之屬矣秦時有尙書令尙書僕射尙書丞至漢初並隸少府漢東京猶文屬焉古者重武官以善射者掌事故曰僕射僕射者僕役于射事也秦世有左右曹諸吏官無職事將軍大夫以下皆得加此官漢武帝世使左右曹諸吏分平尙書事昭帝卽位霍光領尙書事成帝初王鳳錄尙書事漢東京每帝卽位輒置太傅錄尙書事薨輒省晉康帝世何充讓錄表曰咸康中分置三錄王

導錄其一荀崧陸暉各錄六條事然則似有二十四條若止有十二條則荀陸各錄六條導又何所司乎若導總錄荀陸分掌則不得復云導錄其一也其後每置二錄輒云各掌六條事又是止有十二條也十二條者不知悉何條晉江右有四錄則四人參錄也江右張華江左庾亮並經關尚書七條則亦不知皆何事也後何充解錄又參關尚書錄尚書職無不總王肅注尚書納于大麓曰堯納舜于尊顯之官大錄萬機之政也凡重號將軍刺史皆得命曹授用唯不得施除及加節宋世祖孝建中不欲威權外假省錄大明末復置此後或置或省漢獻帝建安四年以執金吾榮邵爲尚書左僕射衛臻爲右僕射二僕射分置自此始也漢成帝建始四年初置尚書員四人增丞亦爲四人曹尚書其一曰常侍曹主公卿事其二曰二千石曹主郡國二千石事其三曰民曹主吏民上書事其四曰客曹主外國夷狄事光武分二千石曹爲二又分客曹爲南主客曹北主客曹改常侍曹爲吏曹凡六尚書減二丞唯置左右二丞而已應劭漢官云尚書令左丞總領綱紀無所不統僕射右丞掌稟假錢穀三公尚書二人掌天下歲盡集課吏曹掌選舉齋祠二千石曹掌水火盜賊詞訟罪法客曹掌羌胡朝會法駕出護駕民曹掌繕治功作鹽池苑囿吏曹任舉多得超遷則漢末曹名及職

司又與光武時異也魏世有吏部左民曹五兵度支五曹尙書晉初有吏部三公客曹駕部屯田度支六曹尙書武帝咸寧二年爲駕部尙書四年又置太康中有吏部殿中五兵田曹度支左民六曹尙書惠帝世又有右民尙書尙書止于六曹不知此時省何曹也江左則有祠部吏部左民度支五兵合爲五曹尙書宋高祖初又增都官尙書若有右僕射則不置祠部尙書世祖大明二年置二吏部尙書五兵尙書後還置一吏部尙書順帝昇明元年又置五兵尙書

尙書令任總機衡僕射尙書分領諸曹左僕射領殿中主客二曹吏部尙書領吏部刪定三公比部四曹祠部尙書領祠部儀曹二曹度支尙書領度支金部倉部起部四曹左民尙書領左民駕部二曹都官尙書領都官水部庫部功部四曹五兵尙書領中兵外兵二曹昔有騎兵別兵都兵故謂之五兵也五尙書二僕射一令謂之八坐若營宗廟宮室則置起部尙書事畢省

中書令一人

中書舍人一人

中書侍郎四人

中書通事舍人四人漢武帝游後廷始使宦者典尚書事謂之中書謁者置令僕射元帝時令弘恭僕射石顯秉勢用事權傾內外成帝改中書謁者令曰中謁者令罷謁者漢東京省中謁者令而有中宮謁者令非其職也魏武帝爲王置祕書令典尚書奏事又其任也文帝黃初初改爲中書令又置監及通事郎次黃門郎黃門郎已署事過通事乃奉以入爲帝省讀書可晉改曰中書侍郎員四人晉江左初改中書侍郎曰通事郎尋復爲中書侍郎晉初置舍人一人通事一人江左初合舍人通事謂之通事舍人掌呈奏案章後省通事中書差侍郎一人直西省又掌詔命宋初又置通事舍人而侍郎之任輕矣舍人直閣內隸中書其下有主事本用武官宋改用文吏

太傅太保太宰太尉司徒司空大將軍第一品尚書令僕射尚書中書監令第三品

武帝永初三年遺詔後世若有幼主朝事一委宰相母后不煩臨朝 按宋書武帝本紀永初三年夏五月上疾甚爲手詔曰朝廷不須復有別府宰相帶揚州可置甲士千人若大臣中任要宜有爪牙以備不祥人者可以臺見隊給之有征討悉配以臺見軍隊行還復舊後世若有幼主朝事一委宰相母后不煩臨朝

南齊

南齊以國相太宰大司馬大將軍皆爲公爲贈官置太傅及太尉司徒司空主國家大政有長史主簿祭酒令史之屬而尚書令僕射專總諸曹 按南齊書百官志國相 蕭曹以來爲人臣極位宋孝建用南譙王義宣至齊不用人以爲贈不列官

太宰 宋大明用江夏王義恭以後無人齊以爲贈

太傅 太師太保太傅周舊官漢末董卓爲太師晉惠帝初衛瓘爲太保自後無太師而太保爲贈齊唯置太傅

大司馬 大將軍 宋元嘉用彭城王義康後無人齊以爲贈

太尉 司徒 司空 三公舊爲通官司徒府領天下州郡名數戶口簿籍雖無常置左右長史左右掾屬主簿祭酒令史以下晉世王導爲司徒右長史于寶撰立官府職儀已具

錄尚書 尚書令 總領尚書臺二十曹爲內臺主行遇諸王以下皆禁駐左右僕射分道無令左僕射爲臺主與令同

左僕射 領殿中主客二曹事諸曹郊廟園陵車駕行幸朝儀臺內非違文官舉補滿敘疾假事其諸吉慶瑞應衆賀災異賊發衆變臨軒崇拜改號格制莅官銓選凡諸除署功論封爵貶黜八議疑讞通關案則左僕射主右僕射次經維是黃案左僕射右僕射署朱符見字經都丞竟右僕射橫畫成目左僕射畫令畫右官闕則以次并畫若無左右則直置僕射在其中間總左右事

梁

梁制丞相太宰太傅太保大將軍大司馬太尉司徒司空開府儀同三司皆爲公主國家大政尙書省置令僕射以佐萬機中書省又置監令以出納帝命 按隋書百官志梁武受命之初官班多同宋齊之舊有丞相太宰太傅太保大將軍大司馬太尉司徒司空開府儀同三司等官諸公及位從公開府者置官屬有長史司馬諮議參軍掾屬從事中郎記室主簿列曹參軍行參軍舍人等官其司徒則有左右二長史又增置左西掾一人自餘僚佐同於二府有公則置無則省而司徒無公唯省舍人餘官常置開府儀同三司位次三公諸將軍左右光祿大夫優者則加之同三公置官屬尙書省置令左右僕射各一人又置吏部祠部度支左戶都官五兵等六尙書左右丞各一人吏部

刪定三公比部祠部儀曹虞曹主客度支殿中金部倉部左戶駕部起部屯田都官水部庫部功論
中兵外兵騎兵等郎二十三人令史百二十人書令史百三十人

尚書掌出納王命敷奏萬機令總統之僕射副令又與尚書分領諸曹令闕則左僕射爲主其祠部
尚書多不置以右僕射主之若左右僕射並闕則置尚書僕射以掌左事置祠部尚書以掌右事然
則尚書僕射祠部尚書不恆置矣又有起部尚書營宗廟宮室則權置之事畢則省以其事分屬都
官左戶二尚書左右丞各一人佐令僕射知省事左掌臺內分職儀禁令報人章督錄近道文書章
表奏事糾諸不法右掌臺內藏及廬舍凡諸器用之物督錄遠道文書章表奏事凡諸尚書文書詣
中書省者密事皆以挈囊盛之封以左丞印

中書省置監令各一人掌出內帝命侍郎四人高功者一人主省內事又有通事舍人主事令史等
員及置令史以承其事通事舍人舊入直閣內梁用人殊重簡以才能不限資地多以他官兼領其
後除通事直日中書舍人

武帝大同六年詔尚書中有疑事先於朝堂參議然後啟聞 按梁書武帝本紀大同六年秋八月

辛未詔曰經國有體必詢諸朝所以尙書置令僕丞郎旦旦上朝以議時事前共籌懷然後奏聞頃者不爾每有疑事倚立求決古人有云主非堯舜何得發言便是故放勛之聖猶咨四岳重華之叡亦待多士豈寡德所能獨斷自今尙書中有疑事前於朝堂叅議然後啟聞不得習常其軍機要切前須諮審自依舊典

陳

陳置相國列丞相上以丞相太宰太傅太保大司馬大將軍爲贈官其政事一歸中書省而以舍人分領之按隋書百官志陳承梁皆循其制官而又置相國位列丞相上并丞相太宰太傅太保大司馬大將軍並以爲贈官中書省有中書舍人五人領主事十人書吏二百人書吏不足并取助書分掌二十一局事各當尙書諸曹並爲上司總國內機要而尙書唯聽受而已被委此官多擅威勢

北魏

明元帝神瑞元年置八大人官總理萬機按魏書明元帝本紀不載按官氏志神瑞元年春置

八大人官大人下置三屬官總理萬機故世號八公云

太武帝神麤元年置左右僕射 按魏書太武帝本紀不載 按官氏志神麤元年三月置左右僕

射左右丞諸曹尙書十餘人各居別寺

太平真君五年以皇太子總百揆而穆壽等輔之 按魏書太武帝本紀太平真君五年春正月壬

寅皇太子始總百揆侍中中書監宜都王穆壽司徒東郡公崔浩侍中廣平公張黎侍中建興公古

弼輔太子以決庶政 按官氏志真君五年正月侍中中書監宜都王穆壽司徒東郡公崔浩侍中

廣平公張黎輔政置通事四人

孝文帝太和 年議定三師二三大三公及尙書中書階品 按魏書孝文帝本紀不載 按官氏志

太和中高祖詔羣僚議定百官著於令

三師上公 太師 太傅 太保 二大 大司馬 大將軍 右第一品上

三公 太尉 司徒 司空 右第一品中

諸開府 儀同三司 都督中外諸軍事 特進 三將軍 驃騎將軍 車騎將軍 二將軍加
大者在